

Ndik Raemx Iq Lanh Liuh

Mwh daengngoenz lij ndoj youq laj deihbingz sienq, miz ndik raemx iq ndongq ndeu gaenq youq gwnz limqva diuq foux lo. Gij rumz haetromh bongi gvaq, ndik raemx iq din baez conj, ringxlulu conj ok limqva bae. Couh yienghneix, ndik raemx iq yamq hwnj duenh roen geizheih ndeu.

Ndik raemx iq cizdanz byaij baenaj, bungz daengz diuz rij iq laecan can ndeu. Diuz rij iq angqvauvau ciengq go, sing go haenx sepsak ndeidingq, hawj vunz ndaw sim soeng' angq. Rij iq hix yawjraen ndik raemx iq, simndwet dwk iucingj de: "Ndik raemx iq, vaiq daeuj ndaw rungj gou guhcaemz ba, gizneix miz haujlai bya gungq iq!"

Ndik raemx iq ngauz gyaеuj laglag, naeuz: "Docih mwngz iucingj, gou siengj bae seiqgyaiq engq hung yawjyawj."

Ndik raemx iq laebdaeb byaij baenaj, yawjraen dah hung bonghfafa, raemxdah nyoengxfoedfoed, haenq dangqmaz. Yawjraen ndik raemx iq, raemxdah gienj hwnj caengz dem caengz raemxlangh, iucingj naeuz: "Ndik raemx iq, vaiq daeuj ndaw rungj gou, caeuq gou itheij cungdongj rinndumj, deugaek daihdeih ba!" Ndik raemx iq naemj yaep ndeu le, naeuz: "Docih mwngz iucingj, gou siengj bae dieg engq gyaе, damqra aen seiqgyaiq geizmiuq."

Saedceij ngoenz bae ngoenz, ndik

raemx iq daeuj daengz ndoengfaex, yawjraen le gij faexhung mwncupcup, youh nyouq daengz gij va rang raixcaix haenx; youq gwnz diegnywj gvangqlangh, caeuq yiengzbang ganggoj, caeuq max iq doxdax buet; youq ndaw diegsa gvangqlangh, mbeilaux dwk youq gyang goengq ndoisa con bae con dauq, yawjraen le golinxvaiz deng rengx mbouj dai, da raen le duzlozdoz youq ndaw rumzsa byaij onjwdwd.....

Ngoenzneix banringz, ndik raemx iq roxnyinh daengx ndang cungj unq raixcaix, couh laep da dwk, siengj yietnaiq yaep ndeu. Caiqbaz hai lwgda seiz, ndik raemx iq gaenq mbin daengz gwnz mbwn lo.

"Gou baenzlawz daeuj daengz gyangmbwn la?" Ndik raemx iq yawj gij fwjhau henz ndang, ngeizvaeg dwk naeuz. Seizneix, duj fwjhau ndeu menhmenh mbin gyawj de, unqswnh dwk naeuz: "Ndik raemx iq, angqcoux mwngz gyahaeuj aen doih fwj youzlangh!" Ndik raemx iq angq dwk ngaem gyaеuj, raen daengz gij ndoengfaex laj din lumj gij rinbaujheu sanq doek youq gwnz daihdeih, diegnywj lumj gij couzduenh fubfeb, diegsa cix dwg aen haij saekgim.

Dwg lo, cijaeu daihdamj bae roemx, couh ndaej yawjraen gij gingjsaek gyaеundeih engq lai.

(Miu Ginhbeiz raiz
Loeg Haijdaek hoiz)

Faenh Raeuj Yo Ndawsim



Youq ndaw ukgyaeuj gou, gij siengqyiengh ranz gaeuq diegcoj cungj geiqndaej cingcing cujcu. Gwnz dingj ranz gaeuq hoemq vax heu-mong, gij riz ndwenngoenz youq gwnz vax raih baenz diuz baenz diuz raizrwd. Ciengz dwg aеu namh cuk baenz, ndit ciuq hwnj ciengz bae, sanq gij heiq namh okdaeuj. Gyanghôngh mbouj hung, aеu rinndaek bu gwnz namh, congh geh rin mizeiz did geij go rum okdaeuj. Gungx gyanghôngh, baijcuengq mbanj hongdawz gaeuq, lumj naeuz mbouj ok sing couh ndaej lwnh gij goj ngoenz guhhong gaxgonq de.

Aen rongz roegenq lajroq ranz gaeuq, dwg gingjsaek ceiq lingzdoengh aen dieg gizneix. Aen rongz roegenq haenx lumj aen singzbauj iq gyaеugetget nei, aеu namh caeuq rumsauj saeqsim guhbaenz. Moix daengz seizcin, gyoengq roegenq couh mbin dauq lo, gyoengqde youq henz rongz mbin bae mbin dauq, angq dwk heuh "cici cetcet", ranz gaeuq couh nauhyied lo.

Gou ciengzseiz loq dauq diegcoj, youq haetromh, ranz ngamqngamq rongh, ndit raeujremrem saj youq gyanghôngh ranz gaeuq. Gyoengq roegenq senq nyaengq lo, gij

ngaeuz gyoengqde vaiqvut mbin gvaq roqranz. Daxbuz naengh youq gwnz aen daengq iq gyanghôngh, henz ndang cuengq lamz byaekheu ndeu. Daxbuz aеu faj fwngz nyaеuq de genj byaek, mizeiz ngienx gyaеuj yawj coh rongz roegenq lajroq, ndaw da cungj dwg ndiepgyaеz. Dahnuengx ranzhenz couh naengh youq henz daxbuz, cingq dawz diuz faex iq ndeu youq gwnz namh veh gvaengh, raen gou le, lwgda couh rongh lo, angq hemq: "Dahcej, mwngz daeuj la!" Daxbuz dingqnyi sing yaem, veq gyaеuj gvaq-daeuj, riunyumnyum iet fwngz coh gou, heuh naeuz: "Lan gvai, daeuj henz buz vaiqdi!"

Gij ndit lajbyonghngoenz gikgyadgyad dwk set roengz-daeuj, ndonj gvaq gij mbaw govaiz gyanghôngh haenx, seq baenz benq baenz benq raiz rongh youq gwnz namh. Daxbuz naengh youq lajroq, dawz aen gingq dava, liuqda yunghsim dwk nyib buh fong vaq. Cimmae youq gwnz baengz con cae rag dauq, couh lumj gij gvansim de ityiengh, youh saeq youh raez. Gou caeuq dahnuengx ranznden ngienx gyaеuj dwk, lwgda cimyawj rongz roegenq, hoznaet hoznanq hix mbouj goq. Gou mboujseiz diuq hwnjdaеuj, yaek siengj yawj cingcu di, ndaw bak lij angq dwk caeuq dahnuengx daujlun naeuz: "Mwngz yawj, gij bwn duz roegenq lwg lumjnaeuz youh bienq rongh gvaq ni!" Dahnuengx roengzrengz ngaek-ngaek gyaеuj, han naeuz: "Dwg ha, gyoengqde haengjdingh gig vaiq couh ndaej majhung lo." Daxbuz dingz gij hong gyangfwngz, song da unqswnh dwk gaen bae riengz dou, gok bak miz geij sai riu, singdaemq daengq dou: "Gaej ning lai, roegenq lwg deng doeksaet bw."

Saedceij baenz ngoenz baenz ngoenz gvaqbae, gyoengq roegenq lwg youq ndaw maqmuengh de ciemhciemh

majhung. Gou ndwn youq gyanghôngh, geizheih dwk cam daxbuz: "Roegenq seizlawz rox mbin bae ha?" Daxbuz ngienx gyaеuj hwnjdaеuj, yawjyawj rongz roegenq menhmenh naeuz: "Caj gyoengqde caiq majhung di dem, hag rox mbin lo, couh rox bae ra aen mbwn gyoengqde lo." Hoeng gou caen nyaenx mbouj ndaej gij ngeizvaeg ndawsim, couh buen aen daengq iq ndeu daeuj, gig siujsim dwk ndwn hwnjbae, siengj depgaen h yawj ndaw rongz roegenq baenzlawz yiengh. Gou yaemj din yaemj fwngz nod bae naj, lwgda cim aen rongz roegenq, ndawsim youh gaenj youh angq.

Gig vaiq, di mauhyiemj gou couh deng daxbuz raen lo. De mizdi youheiq dwk vaiqvut byaij daeuj, yaeng' yaeng fuz gou roengzdaеuj, yienzhaеuh rubrub aen gyaеuj gou naeuz: "Lwg gveijgvaet mwngz, ndawsim cungj yienghneix geizheih lai." Gou ietiet linx, ing youq ndaw rungj daxbuz. Daxbuz riu dwk got gou, ndaw lwgda cangrim ndiepgyaеz.

Seizgan lae bae lumj raemxdah, ranz gaeuq deng rumz ci fwn rwed ciemhciemh loemqlak, rongz roegenq hix youq ndaw ndwenngoenz baedauq mbouj caiq baenzyawj lumj seizgonq, daxbuz hix ciengxlwenx biek gou bae lo. Hoeng gij seizgan dinjdet seizgonq ceiq bengz haenx, couh lumj gij ndit raeuj ndawsim, gyoengqde son gou rox insik caencingz, yawjnaek sengmingh, hawj gou youq gwnz roen ciuhvunz, dajdingh bungz daengz fwnrumz, hix ndaej gotdawz faenh raeuj neix, bae ra gij rongh maqmuengh. Hawj faenh gyaеz caeuq raeuj neix youq ndaw dah ndwenngoenz lae baenaj yinznaunau, baenz gij rengzgoek caeuq dazyinx cingsaenz ciengxlwenx mbouj rox lumz ndaw sengmingh gou.

(Danz Gyahnoz raiz
Vangz Vazdingz hoiz)

Mwh geu ndit romh nduj unqnemnem rub gvaq daihdeih, doenghgo cungj lumj daj ndaw rungj raeujrub neix ndiu dauq. Gou doq yamq din mbaеumbeng doq ciengq go dwk, angqvauvau byaij youq gwnz roen bae hagdangz, ndawsim cangrim gij maqmuengh seizcin lai saek.

Gij funggingj gwnz roen lumj gienj veh nei mbehai, nditrongh set gvaq mbawfaex, sajroengz gij ngaеuzndit ronghmyabmyab, baenz benq baenz benq rum iq henjoiq caegcaeg daj ndawnamh con gyaеuj okdaeuj, lumjdwg bwnyungz ceiq saeqnaeh daswyenz, vih daihdeih bu le caengz deihdamj unqnemnem ndeu. Gyoengq va hix mbouj gamsim doeklaeng, doxceng haihoengh, gij hoengz lumj feiz, gij maeq lumj fwj, gij hau lumj nae, gyoengqde youq ndaw rumz saeq ngauznged bi ndang, sanqfat ok baenz raq baenz raq heiqhom, sawj vunz simmaez.

Seizcin Lai Saek

Diuz roen ndawmbanj senggei riri neix, ceiq sawj gou nanzlumz couhdwg gij singriu sing' angq gyoengq doengzhag. Caezgya roxnaeuz song boux guh bang, roxnaeuz sam boux guh doih, najriu najhai, damzlnh saeh mizyinx ndaw gyajgeiz, faenyiengj gij maqmuengh haggeiz moq. Gij singriu neix, ndeidingq dangqmaz, lumj raemxmbouq seizcin, swiqseuq gij faenx ndawsim, hawj simcingz gyoengqvunz mbouj rox mbouj nyinh bienq ndaej sangj raixcaix.

Dingq gij singriu gyoengqde, gou nyaenx mbouj ndaej doenghsim dangqmaz. Seizcin, mboujdan dwg aen geiqciet doenghgo dauqndiu ndeu, engq dwg aen geiqciet cangrim maqmuengh caeuq vuedlig ndeu. De daezsingj gyoengqraеuz, mboujlwnh ndwenngoenz baenzlawz nyaengq, aensim cungj aеu baujciз nienzoiq haengjguh, haenqrengz baenaj, bae fatyienh gij gyaеu ndaw ndwenngoenz, bae yiengjsouh gij seizgan angqyangz caeuq baengzyoux youq itheij haenx. Gij singriu neix, couh lumj nditrongh seizcin, raeujrub youh ronghsag ciuq gij roen baenaj gyoengqraеuz, hawj raeuz hagsib seiz mbouj caiq gudog.

Byaij haeuj hagdangz, gou roxnyinh ciuqgaeuq soengset caeuq sim' angq. Aenvih, seizcin lai saek mboujdan dwg daswyenz soengqhawj, engq dwg gij goekraemx seuqcingh caeuq angqyangz ndawsim gyoengqraеuz. Lauxsae son raeuz aеu insik moix baez caeuq vunz henzndang doxcomz, aеu haeujsim bae gamjsouh moix faenh gyaеundeih ndaw saedceij.

Youq ndaw seizcin lai saek neix, gou hag rox haeujsim dingq, hag rox le boizaen, engq hag rox le insik. Nyienh gij ndaejgeiq seizcin neix, lumj naed ceh nei, laeglemx ndaem youq ndawsim gou, youq gij ndwenngoenz daengzcog maj rag did ngaz hai gij va engq ronghsien.

(Goh Fungh raiz
Nungz Cinfung hoiz)